

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN HAJI MOHD FASIAH BIN HAJI MOHD FAKEH
[SABAK BERNAM]

TARIKH : 18 JUN 2014

SOALAN : Tuan Haji Mohd Fasiah bin Haji Mohd Fakeh [Sabak Bernam] minta YB MENTERI LUAR NEGERI menyatakan sejauh manakah kemampuan Malaysia untuk menduduki anggota bukan tetap Majlis Keselamatan Pertubuhan Bangsa-Bangsa Bersatu (PBB) dan seterusnya memainkan peranan utama dalam usaha damai menyatukan HAMAS dan Fatah melalui pembentukan Kerajaan Perpaduan Palestin yang kukuh.

JAWAPAN

Tuan Yang Di-Pertua,

Saya ingin mengucapkan terima kasih kepada YB Sabak Bernam di atas soalan beliau.

2. Untuk makluman dewan yang mulia ini, Malaysia telah menduduki kerusi tidak tetap Majlis Keselamatan Pertubuhan Bangsa-Bangsa Bersatu (PBB) sebanyak tiga (3) kali sebelum ini, iaitu pada 1965, 1989-1990, dan 1999-2000. Ini mencerminkan pengiktirafan dan kepercayaan negara-negara anggota PBB yang lain ke atas kemampuan Malaysia untuk menggangotai Majlis tersebut. Kemampuan dan kredibiliti Malaysia turut terbukti melalui sumbangan berterusan dan penglibatan aktif Malaysia dalam pelbagai isu yang dikemukakan di PBB.

3. Bermula dengan misi pengaman di Congo pada tahun 1960, Malaysia terus terlibat secara aktif di dalam lebih 30 misi pengaman PBB yang melibatkan lebih 29,000 anggota dari Angkatan Tentera Malaysia dan Polis DiRaja Malaysia. Sumbangan Malaysia di dalam bidang ini dihargai oleh pihak PBB dan juga negara anggota PBB yang lain yang mana memuji kemampuan dan keupayaan anggota pengaman dari Malaysia.

Tuan Yang Di-Pertua,

4. Pengiktirafan terhadap kemampuan Malaysia turut terbukti apabila Malaysia seringkali menerima maklumbalas yang baik dan memberangsangkan daripada negara anggota PBB yang lain sepanjang usaha melobi dijalankan. Negara anggota PBB yang lain turut mengalu-alukan keanggotaan Malaysia di Majlis Keselamatan PBB dan menyatakan sokongan dan kesediaan mereka untuk bekerjasama dengan Malaysia melalui Majlis tersebut.

Tuan Yang Di-Pertua,

5. Malaysia merupakan antara negara anggota PBB yang sering menyuarakan sokongan padu terhadap usaha damai antara Hamas dan Fatah di PBB, termasuk di pelbagai platform antarabangsa. Malaysia berpendirian teguh dan akan terus menyokong usaha tersebut demi keamanan rakyat Palestin.

Sekian, terima kasih.